



UNIVERSITÄTS-
BIBLIOTHEK
PADERBORN

**EVANGE=||LIA || QVAE CONSVETO || MORE DOMINICIS ET ||
alijs Festis diebus in Eccle-||sia leguntur**

Aemilius, Georg

COLONIAE, 1555

Dominica Post Natalem Domini. Evangelivm Lvc. II. Cap.

[urn:nbn:de:hbz:466:1-69317](https://nbn-resolving.org/urn:nbn:de:hbz:466:1-69317)

DOMINICALIA.

Hinc ubi nota satis tanti miracula partus,
Discedunt iterum læti, plebemq; per omnem
Notificant, quæ dicta sibi tum uisa fuerunt.
Obstupere super pastorum uocibus omnes,
Atq; nouum mirantur opus, dictumq; puellum
Aedidit insueto quem uirgo puerpera partu.
At pia seruabat tacito sub pectore mater
Omnia, de puero quæ prodita uerba fuissent,
Singula sollicito secum sub corde uolutans,
Expendensq; uirum uoces, casumq; futuros.
Hinc ubi pastores populum sparsere per omnem
Nuncia de celo patefacta & cognita coram,
Continuò campos repetunt, caulasq; reuisunt,
Laudantes dominum cæli super omnibus illis,
Quæ narrata sibi primùm, post uisa fuissent.
Omnis cantus erat, Puer, omneq; carmen, Iesus:
Omnibus hoc læti calamis & uoce sonabant:
Cuncta repercussis reddebat uocibus Echo.

DOMINICA POST NATALEM DOMINI.

EVANGELIUM LUC. II. CAP.

ARGUMENTVM.

Predicit Symeon casus tibi uirgo futuros,
Hanna patris uates nec Phanuelis abest.

Talia

EVANGELIA

Talia de puero quæ dicebantur Iesu,
 Mirati secum materq; paterq; fuerunt.
 Protinus hic illis Symeon benedixit, & ore
 Vaticidico cœpit Mariæ sic dicere matri:
 Aspice quem casto genuisti corpore natum,
 In tristem positus multorum est ille ruinam:
 Aspice & hoc multi Solyma de gente resurgent.
 Namq; erit in signum, contrâ cui dicere plures
 Audebunt, odioq; uirum grauiore laceffent.
 Tunc animam gladius tibi pertransibit acutus,
 Pectora multorum quò tandem arcana pateffant,
 Quæ diu latuere animis, cernantur aperte.
 Talia cum fierent, mulier tum fortè Prophetis
 Adfuit Hanna simul, Phanielis filia patris,
 Stirpis Azaræ, senio iam cana trementi.
 Illa suo septem cum coniuge uixerat annos:
 Post, ubi defunctum rapuissent fata maritum,
 Constituit cœlebs uiduam traducere uitam:
 Lustraq; bis septem totidem subiunxerat annis,
 Iam defecta tremens, tristiq; absumpta senectâ.
 Sed tamen ignauo non pectore sacra colebat,
 Semper & in templo domini ceu serua manebat
 Ieiunans cum nocte diem, constanter, & orans.
 Hæc etiam puerum uenerans accessit Iesum.

Lauda

DOMINICALIA.

Laudauitq; Deum, qui pignora tanta dedisset,
Plurima uerba super promisso semine fundens,
Monstrabatq; nouam populis instare salutem,
Quæ Solymis annos tot iam expectata fuisset.
Talia plena Deo præfaga mente canebat.
Iamq; ubi cuncta pie matri perfecta fuissent
Debita sacrorum, fieri quæ Lege iubentur,
Obtulerit primum si quando puerpera natum,
Protinus in patrias terræ Galilæidos oras
Fida redit genitrix, charo comitante marito:
Perq; alterna uias infansem brachia gestant,
Donec ubi celo ueniens lux quarta refulsit,
Nazaream subeunt finitis cursibus urbem,
Et patrios tetigisse lares, sua limina, gaudent.
At puer interea primos crescebat in annos,
Corporis atq; animi mirando robore surgens.
Namq; Dei præsens firmabat Spiritus illum.
Hinc insueta subit teneram sapientia mentem:
Qualis ab humano non semine prouenit unquam.
Gratia tum Domini puerum complexa sœuebat.

IN DIE CIRCUMCISIONIS DOMINI.
EVANGELIUM LUCÆ II.

ARGUMENTVM.

Octo dies ierant, cum circumciditur Infans,
Atq; datum celo nomen Iesus habet.

B Lux